


Parlamentario mr. Xiomara Ruiz-Maduro:

AVP ta cambia color di nos bandera y ta dividi nos Pueblo

AWOR en adelante Pueblo di Aruba lo mira un otro color di bandera bula na nos Pais. Esaki ta debi na e hecho cu AVP a dicidi pa cambia e color di e bandera di nos Pais. E cambio aki a bay sin cu Pueblo a wordo debidamente poni na altura di esaki. E ta un necesidad berdad pa por tin un



solo color di bandera, pero mas importante ta cu nos Pueblo wordo splica cu e color poni den ley ta diferente na e color di e bandera cu Pueblo ta custuma cu ne. Pa evita e sorpresa aki y sigur pa evita cu nos Pueblo ta wordo dividi riba un simbolo asina importante pa nos Pais manera nos bandera, Fraccion di MEP a presenta un mocion den Parlamento pa laga Pueblo duna su opinion prome cu Parlamento tuma un decision pa haci cambio den e ley di bandera. Den e mocion nos Fraccion a trece dilanti cu e tema di cambio di color di bandera ta un tema cu ta sumamente delicado den comunidad y alaves di embergadura grandi y fundamental. Parlamento aunke cu e ta representante di Pueblo den un asunto asina fundamental manera bandera di nos Pais no tin

e autoridad pa tuma decision di tal magnitud y fundamental asina cu ta toca identidad di un nacion. Un cambio asina fundamental mester por conta cu e opinion di nos Pueblo prome cu Parlamento aproba of desapropa e ley cu ta haci cambio den e color di nos bandera. Pesey den e mocion nos Fraccion a pidi pa postpone e votacion riba e cambio di ley AB 1991 no.101 te despues di consulta Pueblo riba e cambio di leyaki. E mocion aki no a conta cu sostea di e Fraccion di AVP cual ta algo dilamenta. Asina aki e mayoria den Parlamento ta mal usa nan poder di 13 asiento pa tapa e voz di Pueblo. Di e manera aki eaves di busca un aceptacion den Pueblo pa e cambionan, ta trece mas division haciendo uso di e bandera cu mester ta simbolo di union den nos Pais.